

Giarsunadi en il cor da l'administraziun federala

■ (anr/vi) Rachel Hunziker fa ses giarsunadi en la chanzlia federala. La chanzlia è atgnamain insatge sco il cor da l'entira administraziun federala. Rachel è creschida si a Samedan e suenter scola è ella l'emprim stada plirs mais tar sia nonna en Belgia per emprendre meglier ollandais. Avant dus onns ha ella cumenzà il giarsunadi a Berna. Dad esser en ina citad estra nua ch'ella n'enconuscha nagin n'haja betg fatg ora bler ad ella. «Jau sun gugent in pau suletta», raquinta ella. Ed en sia chasa da dimora chattian ins adina cumpagnia. L'emprim onn gieva Rachel mintga fin d'emna a chasa. En il fratemp ha ella emprendi d'enconuscher amias entras la scola e turna be pli ina giada il mais en l'Engiadina.

Cura ch'ella ha cumenzà a Berna aveva la chanceliera rumantscha *Corina Casanova* gia terminà ses uffizi e *Walter Thurnherr* è stà ses schef suprem. Las emprendistas en chanzlia federala restian adina sis mais en ina secziun e midian lura en in'otra. «Jau ves bler, poss emprendre bler e chatt interessanta la lavur», di Rachel. Da preschent lavura ella en la secziun da comunicaziun ed ha da far



Da vesair politichers enconuscents è per Rachel Hunziker da Samedan normal. Ella fas ses giarsunadi en la chanzlia federala a Berna – gist sper il parlament federal.

servetsch en la chasa da medias. Là lavuran schurnalists da tuttas parts svizras per rapportar dal parlament e dal cussegl federal.

En la chasa da medias van er en ed or ils cussegliers federals sch'els dattan ina conferenza da pressa. La stanza per talas conferenzas sa chatta en il tschaler da la chasa da medias. Ils politichers prominents marschan mintgamai gist sper il pult da retschavida ora nua che Rachel ha ses plaz da lavur. Malgrà il schischuri e vi e nà resta Rachel calma e na sa lascha betg disturbar.

Ch'ella sa rumantsch n'è segir betg stà in dischavantag per obtegnair la piazza en la chanzlia federala – anzi. Plinavant discurra ella tudestg, englais ed anc ina bella partida autras linguas, numnadain franzos, flam, ollandais ed in zichel talian. «Sch'ins discurra pliras linguas èsi adina in avantatg», manegia Rachel. En in onn terminescha ella ses giarsunadi da commerzi. Tge ch'ella vul far suenter na sa ella anc betg propi. Forsa ir a l'Uni? Forsa far ina scolaziun sco managera d'events? Cun tantas linguas ed in diplom da commerzianta en giaglioffa statan en mintga cas avert bleras portas.